

## სასწავლო უნივერსიტეტის „ბაუ ინთერნეიშენალ უნივერსიტი ბათუმი“ სტუდენტთა სწავლის საფასურის გადახდის წესი

### მუხლი 1. სწავლის საფასური

1. სწავლის საფასური არის უნივერსიტეტის მიერ დადგენილი გადასახდელი, რომელსაც სტუდენტი (ან მისი წარმომადგენელი) იხდის უნივერსიტეტის შესაბამის საგანმანათლებლო პროგრამაზე სწავლისათვის.
2. უნივერსიტეტის წესდების 42 მუხლის მეოთხე პუნქტის თანახმად სწავლის საფასურსა და გადახდის პირობებს განსაზღვრავს პარტნიორთა კრება, ამასთანავე კონკრეტული სტუდენტის შემთხვევაში შესაძლებელია განხორციელდეს კონკრეტული შეღავათები, რაც აისახება სტუდენტის ჩარიცხვის ბრძანებაში.

### მუხლი 2. სწავლის საფასურის გადახდის საფუძველი და ფორმა

1. სწავლის საფასურის გადახდის საფუძველია უნივერსიტეტის სტუდენტის სტატუსის მოპოვება.
2. სტუდენტთან გაფორმებულ ხელშეკრულებაში აისახება, რომ უნივერსიტეტის სტუდენტის ფინანსური ვალდებულებები განისაზღვრება ამ წესის შესაბამისად.
3. უნივერსიტეტის სტუდენტის სტატუსის შეწყვეტისთანვე წყდება ხელშეკრულება, ხოლო უნივერსიტეტის სტუდენტის სტატუსის კანონმდებლობით დადგენილი წესით ხელახლა მოპოვების შემთხვევაში მხარეებს შორის ფორმდება ახალი ხელშეკრულება.
4. სწავლის საფასურს იხდის სტუდენტი (ან მისი წარმომადგენელი), ხოლო საქართველოს განათლებისა და მეცნიერების სამინისტრო სტუდენტის სწავლის საფასურს აანაზღაურებს დადგენილი წესის შესაბამისად სტუდენტის მიერ მოპოვებული სასწავლო გრანტის/სამაგისტრო გრანტის პროცენტული ოდენობის მიხედვით.

### მუხლი 3. სტუდენტის ფინანსური ვალდებულებები და სწავლის საფასურის გადახდის ვადები

1. სტუდენტი ვალდებულია გაიაროს ადმინისტრაციული რეგისტრაცია ყოველი სასწავლო სემესტრის დაწყებიდან ერთი კვირის ვადაში. შემოდგომის სემესტრის დასაწყისში გადაიხადოს სწავლის საფასურის 50 %, ხოლო დარჩენილი 50% - გაზაფხულის სემესტრის დაწყებიდან ერთი კვირის ვადაში.
2. პირადი განცხადების საფუძველზე უნივერსიტეტის სტუდენტის სტატუსის შეწყვეტის შემთხვევაში, მაგრამ არაუგვიანეს ადმინისტრაციული რეგისტრაციის დაწყებიდან 20 დღისა, სტუდენტს დაუბრუნდება წინასწარ გადახდილი სწავლის საფასური, ხოლო იმ შემთხვევაში, თუკი სემესტრის დაწყებიდან 20 დღის ვადაში სტუდენტს არ ექნება გადახდილი სწავლის საფასური და ამავე ვადაში მოითხოვს სტუდენტის სტატუსის შეწყვეტას, არ დაეკისრება ამ სემესტრის სწავლის საფასურის გადახდის ვალდებულება.
3. უნივერსიტეტის სტუდენტის სტატუსის შეწყვეტისას, გასულ პერიოდში გადახდილი სწავლის საფასური სტუდენტს უკან არ დაუბრუნდება, გარდა იმ შემთხვევისა, როცა მას წინასწარ ჰქონდა გადახდილი მომდევნო სასწავლო წლის/სემესტრის სწავლის საფასური.
4. სტუდენტს გადახდილი სწავლის საფასური არ უბრუნდება ასევე აკადემიური შვებულების აღების (სტუდენტის სტატუსის შეჩერების) შემთხვევაში, თუმცაღა ჩაეთვლება გადახდილად შვებულებიდან დაბრუნების შემდგომ პერიოდში.

5. სტუდენტს სასწავლო პროგრამით გათვალისწინებულ ვადებში უნარჩუნდება ხელშეკრულებით დადგენილი საფასურის ოდენობა, ხოლო აღდგენის წესით ჩარიცხვის და სტუდენტის სტატუსის შეჩერების საფუძვლების აღმოფხვრის შემთხვევაში სტუდენტი იხდის შესაბამის საგანმანათლებლო პროგრამაზე მიმდინარე სასწავლო წლისათვის დადგენილ სწავლის საფასურს.

#### **მუხლი 4. სწავლის საფასურის გადაუხდელობის შედეგები**

1. უნივერსიტეტის სტუდენტი, თუკი შესაბამისი სწავლის საფეხურის ყოველი სემესტრის დაწყებიდან ერთი კვირის ვადაში არ გაივლის ადმინისტრაციულ რეგისტრაციას -არ გადაიხდის სწავლის საფასურს სრულად, ადმინისტრაციული რეგისტრაციის დასრულებიდან არაუგვიანეს 10 დღისა, შეუჩერდება სტუდენტის სტატუსი.

უნივერსიტეტის მიერ დადგენილ ვადებში ადმინისტრაციული რეგისტრაციის გავლის გარეშე სტუდენტის სასწავლო პროცესში თვითნებური მონაწილეობა არ წარმოშობს მის უფლებას მოითხოვოს ადმინისტრაციული რეგისტრაციის დამატებით გავლა და მიღებული მომსახურების (შეფასებების) აღიარება.

2. ფინანსური დავალიანების გამო უნივერსიტეტის სტუდენტს სტატუსის შეჩერებიდან 5 წლის გასვლის შემდეგ პირს უწყდება უნივერსიტეტის სტუდენტის სტატუსი.

#### **მუხლი 5. სწავლის საფასური სასწავლო კურსის განმეორებით ან დამატებით გავლისათვის**

1. სტუდენტის მიერ, მისივე გამოწვეული მიზეზით საგნის (კრედიტების) განმეორებით ათვისების საჭიროების შემთხვევაში, იმის მიხედვით, თუ რომელი საფეხურის საგანმანათლებლო პროგრამის სტუდენტია და რას შეადგენს მისი სწავლის ღირებულება (ტარიფი), სწავლის საფასურის გადახდა ადმინისტრაციული რეგისტრაციის პერიოდში ხორციელდება ასათვისებელი კრედიტების რაოდენობის შესაბამისად.

2. ამ მუხლით დადგენილი წესი ვრცელდება ასევე იმ შემთხვევაზე, როცა პირი მიმდინარე სასწავლო წლის პროგრამით გათვალისწინებულისაგან დამატებით არეგისტრირებს ასათვისებელ კრედიტებს.

#### **მუხლი 6. გაცვლითი სასწავლო პროგრამის (პროექტის) მონაწილე სტუდენტებისათვის განსაზღვრული ფინანსური ვალდებულებები**

1. გაცვლითი სასწავლო პროგრამის (პროექტის) მონაწილე სტუდენტი ამ პროგრამის ვადის ამოწურვიდან ( საგანმანათლებლო პროგრამაზე სასწავლებლად დაბრუნებიდან) არაუგვიანეს ერთი კვირისა, ვალდებულია გადაიხადოს დარიცხული სწავლის საფასური (დავალიანება), ხოლო მიმდინარე გადასახდელი ადმინისტრაციული რეგისტრაციის პერიოდში.

2. საგანმანათლებლო პროგრამაზე სასწავლებლად დაბრუნების შემდეგ შედგენილი „პროგრამების თავსებადობის დასკვნის“ მიხედვით განსხვავებული საგნების (კრედიტების) ათვისების საჭიროებისას, სტუდენტი არ იხდის ამ კრედიტების საფასურს.

3. ამ მუხლით განსაზღვრული ფინანსური ვალდებულების შეუსრულებლობის შემთხვევაში სტუდენტზე გავრცელდება ამ წესის მე-4 მუხლით გათვალისწინებული მოთხოვნები.